

Aldiënza dla defensuria zivica en vëndres ai 13 de setëmbër, dales 14.30 – 16.00, a San Martin tla ciasa de comun. Info y prenotaziun: 0471 946 020

La doturia Grete Mahlknecht é demez ai 16 y 17 (lönesc y dedolönesc) de setëmbër y vëgn sotituida dal dotur Letterio Taormina 340 32 28 655

La Uniun Maestri Ladins y la Unité Pastorala VB inviëia a n domisdé de spiritualité y cultura en vëndres, ai 20/09. I s'incuntun dales 15.00 tla dlijia da La Val: tru de meditaziun cina Santa Berbora, reflesciun sön les "Beatitus" cun Christian Ferdigg. Dedò sò Ciablun aurela cörta cun panicia, tutres y cajincí. Cost 15 euro. Prenotesse cina en domënia ai 15/09 pro Inge 339 16 96 311

SAN MARTIN

Tl mëis d'agost él gnü mudé fora l'implant eletronich dles ciampanes söl ciamparin de nosta dlijia. L'implant vedl, ne jô nia plü da cuncé, deache la dita spezialisada n'â nia plü i toc da baraté fora les perts rotes. Porchël éson stá sforzá dá istalé n implant eletronich nü che á costé 16.600 euro. I periun dër bel la popolaziun do osc contribut. Bel dilan de vigni oferta (cunt dla cöra IBAN IT11J 08010 58830 000304004922). *Le Consëi d'Aministrasiun.*

Dër n bel dilan a düc chi che á daidé desfraté le poch dl ploan y romené sò la calonia!
siur Iaco

LUNGIARÜ

Düc é inviá en domënia, ai 15 de setëmbër, ala prozesciun sò La Crusc dales 14.00 da insom le lift demez y lassò te dlijia Liturgia dla Parora dales 15.00.

La ploania da Lungiarü ti dij dër bel dilan ala Fondaziun dla Cassa dl Sparagn / Stiftung Sparkasse Südtirol dl contribut de 5.000 euro ch'ara á dé ca por la restrotoraziun dl ciamparin da Lungiarü.

L'Uniun dl Sport da San Martin tègn n curs de Power Training cun Marta Willeit, che mët man en dedolönesc, ai 17 de setëmbër, por 10 iadi. Le curs é le dedolönesc dales 20.00 - 21.15 tla palestra da San Martin. Le cost é de 60 euro + cherta d'iscriziun ala Uniun dl Sport. Le pröm iade él debann. Informaziuns y prenotaziuns le pröm dé te palestra o pro Marta a 339 73 84 558.

Le Museum Ladin de Tor inviëia dër bel ala daurida dla mostra „Trianala Ladina 2019“ en vëndres, ai 20 de setëmbër, dales 19.00, tla sènta sön Tor. Tla mostra él da odëi opres di artisc Annatina Dermont, Yvonne Gienal, Karin Schmuck, Claus Soraperra, Tobias Tavella y Michael Schrottenthaler. La mostra é daverta ti orars de daurida dl museum cina ai 24 de ma 2020.

Curs de ladin por chi che le sá bele n püch, vigni lönesc dai 30 de setëmbër ai 25 de novëmbër dales 19.30 - 21.00 tl Istitut Ladin. Info y prenotaziuns formaziun.vb@micura.it - 0474 523 110.

Le Consëi de Formaziun d'Al Plan y la Biblioteca Angelo Trebo inviëia a na incuntada cun Georg Pircher, funzionar dl Provinzia, sön l'importanza da despartí le refodam tla vita da vigni de. I s'aspetun en dedolönesc, ai 10 de setëmbër, dales 20.00 tla biblioteca a Al Plan.

L'Assoziaziun Turistica da San Martin chir na secreteria te ofize part time. Por deplü informaziuns: direzione@sanvigilio.com 0474 501 037.



www.unitepastorala.org

Plata dles Ploanies San Martin y Lungiarü

siur Iaco Ploner 333 48 32 765 - ploner.jakob@aruba.it
redaziun: anton.gasser@rolmail.net - 348 27 44 517 / 0474 523 194


08.09. – 15.09.19 nr. 41

ultimo termo por comunicaziuns: jöbia dales 20.00
radio: 90,40 / 93,70

23^a DOMËNIA ia por l'ann C

Vangele do Lüca 14,25-33

Canche n gröm de jënt acompagnâ Gejù, s'âl ôt pormez y ti à dit:
Sc'al n'é un che vëgn da mè y ne desprijëia nia pere y uma,
fomena y mituns, fredesc y sorus, y éinamai súa vita,
ne sciäfiel nia da ester mi discapul.
Chël che ne porta nia súa crusc y ne me vëgn nia do,
ne sciafia nia da ester mi discapul.
Sce un de os ô fâ sò na tor, ne se sèntel
nia jö impröma y fej do i cuné?
O sce n re va a fâ vera cuntra n ater,
ne pënsel nia sura denant?
Porchël ne po degun de os ester mi discapul,
sc'al ne renunziëia nia a döt so avëi.



*Al n'é tröc che acompagnâ Gejù,
bunamënter zënza ponsé do
ci ch'al orò dí: „Ti jí do a Gejù.“*

*Sc'i orun ti jí do messunse ince savëi ch'al nes costará val'.
Savëi ch'i mëssi tó ite na posiziun tlera y mëte priorités te mia vita:
defrunt al cërtil de porsones cun chëres ch'i viri, defrunt a mi avëi
y ince defrunt ales crusc ch'i incuntí tla vita.
Se mëte tles pedies de Gejù n'é nia naota na lista de ci che é da fá y lascé.
Al é val' che á dantadöt da nen fá cun me instës/sa: Odëi ite che ch'i sun:
Cherié/ada da Chël Bel Dî, cherdé/ada da d'ël por inom
y te mi daite ester davert/a a d'ël.
Insciö sunsi ince arjigné/ada da ti jí do a Gejù, da ejaminé tres indó
tla löm de súa parora mies relaziuns cun la jënt, mi raport cun l'avëi
y da afrunté les dificultés y les crusc dla vita.*

	SAN MARTIN	LUNGIARÜ	I agnui tl'esoterica
08.09.19 23ª DOMËNIA DL ANN C Nadé de Santa Maria	9.00 Corona 9.30 Gran Mëssa dla Comunité cun benedisciun dl tëmp	7.55 Corona 8.15 Gran Mëssa dla Comunité 15.00 Corona tla capela de S. Ujöp	L'esoterica vëiga ti agnui figöres reales divines, lominoses, simpatices, che operëia danter les sferes desvalies dl'esistënza y che dëida la jënt. Tles dificultés dla vita dái consolaziun, direziun y confidënza. Chël che i prëia pó ester sigü de so aiüt.
09.09.19 Lönesc Pire Claver,			
10.09.19 Dedolönesc Segra di Doms	19.30 Mëssa ++ Videsott por les Animes	7.30 Mëssa (don Cristiano) de rengraziamënt	
11.09.19 Merecui Felize, Helga, Ludwig		7.30 Mëssa (don Cristiano) por i nüc Silvan y Jennifer ++ Serafin y Emma Clara	
12.09.19 Jöbia Inom de Santa Maria, Miriam, Mia	7.30 Mëssa por Hilda Sottara y families ++ Matí y Paula Tolpeit Corona por vocaziuns	7.30 Mëssa (don Cristiano) por les Animes	
13.09.19 Vëndres Notburga, Jan Crisost.	19.00 Adoraziun chîta 19.30 Adoraziun deboriada	7.30 Mëssa (don Cristiano) + Fonjo Castlunger	
14.09.19 Sabeda Festa dl'Alzada dla Crusc 7.30 Prozesciun sö La Crusc 9.30 Mëssa y ores d'adoraziun	15.30 Mëssa tla Ciasa de Palsa 18.30 Mëssa prefestia + Maria Baldissera	11.00 Noza de Silvan Frenademetz y Jennifer Ulrich 20.00 Mëssa prefestia a d'intenziun de Nazio y Loise Clara por sües families	I agnui tla religiun cristiana La Sacra Scritöra reconësc l'esistënza di agnui, deache süa faziun, so aiüt y so confort é tres indô gnüs sintis tla storia dl popul de Dî. Tl Testamënt Vedl incuntunse i agnui te momënc olache Dî intervëgn por la jënt; tl Testamënt Nü é la funziun di agnui dantadöt orientada sön Gejú Crist. I agnui stá en comunicaziun danter cil y tera y insciö danter Chël Bel Dî y la jënt. Por süa cualité suranaturala nes dá i agnui da intëne ch'i sun liá a n monn spiritual, che é ia delá da nosta esperiënza materiala. Sciöche anunziadus de Dî nes dëida i agnui da sintí y capí l'amur y l'aiüt che Chël Bel Dî nes sporj. "I podun zënzater crëie ti agnui, te chi che Chël Bel Dî nes mostra süa vijinanza y tres chi che ël instës operëia", dij le papa Benedèt XVI.
15.09.19 24ª DOMËNIA DL ANN C Maria Adolorada	9.00 Corona por vocaziuns 9.30 Gran Mëssa dla Comunité por i benefaturs de dljia y calonia	7.55 Corona 8.15 Gran Mëssa dla Comunité 14.00 Prozesciun da insom le lift demez 15.00 Liturgia dla Parora sö La Crusc	
Les comunités da San Martin y Lungiarü Ves dij a Os siur laco de cör n bel dilan di cin' agn de sorvisc da ploan ch'i ëis fat cun tröpa dediziun, amur y responsabilità. Dantadöt se recordunse cun reconescënza de Osta anunziaziun y spligaziun dla parora de Dî, dles zelebraziuns liturgiches tignides cun na gran fede y convinziun dla presënza y dl'aziun de Chël Bel Dî amesa so popul, de Ostes incuntades valëntes cun la jënt, di cërtli dla Bibla y dles incuntades de preparaziun ales gran festes ch'i ti pitâse a chi che â interes, dl'aministraziun di sacramënc cun la preparaziun ala pröma comuniun y ala confermaziun, dles vijites ai amará y dles parores de confort, de Ostes benedisciuns y oraziuns por de vigni sort de intenziuns. Dër bel dilan, Idî S'al paies! Dër bel dilan ti dij trames les ploanies ince ala cöga Ida Frenner por le bun sorvisc a siur ploan y al bëgn dla jënt; valënta y desponibla savöra da ti daurí la porta de calonia ala comunité. Che Idî ti retes le bel sorvisc!			